

आकाशवाणी जयपुर-अजमेर
प्रादेशिक समाचार

दिनांक 14.05.2024

समय: 18.45 बजे

- लोकसभा चुनाव रा सातवां अर आखिरी दौर सारू पर्चा दाखिल करण रो काम पूरो व्हयो-प्रधानमंत्री अर भाजपा रा आला नेता नरेन्द्र मोदी वाराणसी सीट ऊं पर्चो दाखिल कीनो।
- लोकसभा चुनाव रा चौथा दौर मांय काल 67 दशमलव सात-एक फीसदी वोट पड़्या।
- प्रदेश मांय मच्छरां ऊं व्हेवण वाळी बीमारियां री रोकथाम सारू चिकित्सा विभाग ऐप जारी कीनो।
- प्रदेश मांय केई ठौड़ां आज ई आंधी चाली अर बिरखा व्ही-मौसम विभाग 16 मई ऊं गर्मी बधबा रा आसार जताया।

000

प्रधानमंत्री अर भारतीय जनता पार्टी रा आला नेता नरेन्द्र मोदी आज उत्तरप्रदेश रा वाराणसी लोकसभा हलका ऊं चुनाव रो नामपानो दाखिल कीनो। वाराणसी मांय लोकसभा चुनाव रा सातवां अर आखिरी दौर मांय एक जून ने वोट पड़ेला। ई दौर रा चुनाव सारू पर्चा दाखिल करण रो आज आखिरी दिन हो। प्रधानमंत्री कानी ऊं पर्चो दाखिल करण रे मौके एन.डी.ए रा नेता एन.चन्द्रबाबू नायडू, एकनाथ शिंदे, जीतनराम मांझी, संजय निषाद, रामदास अठावले, भाजपा रा राष्ट्रीय अध्यक्ष जे.पी. नड्डा, राजनाथ सिंह अर हरदीप सिंह पुरी समेत भारतीय जनता पार्टी रा केई आला नेता मौजूद हा।

000

लोकसभा चुनाव रा चौथा दौर मांय नौ राज्यां अर केन्द्र रा राज वाळा प्रदेश जम्मू-कश्मीर री 96 सीटां सारू काल 67 दशमलव सात-एक फीसदी मतदाता वोट देवण रो हक इस्तेमाल कीनो। निर्वाचन आयोग रे मुजब आंध्रप्रदेश मांय लोकसभा अर विधानसभा चुनाव सारू सवा अठहत्तर फीसदी मतदाता वोट दीना। लोकसभा चुनाव रा चौथा दौर मांय सत्रह सौ 17 उम्मीदवार चुनावी दौड़ मांय है। निर्वाचन आयोग रे मुजब जम्मू-कश्मीर रा श्रीनगर संसदीय हलका मांय 37 दशमलव नौ आठ फीसदी मतदाता वोट दीना जो लारला केई बरसां मांय सब ऊं बत्तो है। लोकसभा चुनाव रा चौथा दौर सागे ई 23 राज्यां अर केन्द्र रा राज वाळा प्रदेशां रा 379 संसदीय हलकां मांय वोट पड़ ग्या है।

000

देशभर मांय साइबर धोखाधडी रे जरिये मोटी तादाद मांय ब्लेकमेलिंग अर डिजीटल अरेस्ट रा मामला दर्ज व्ह्यां पाछे गृह मंत्रालय एक हजार ऊं बत्ती स्काइप आईडीज ने ब्लॉक कर दीनी है। साइबर अपराधां री रोकथाम सारू साइबर अपराध करण सारू काम लिया ज्या मोबाइल फोन रा सिम कार्ड ब्लॉक कर्या जा रह्या है। मंत्रालय जनता ऊं सावचेत रेहवण बाबत् कह्यो है।

000

पुलिस मुख्यालय, दिल्ली क्राइम ब्रांच री एंटी गैंगस्टर टास्क फोर्स अर हनुमानगढ़ जिला री डीएसटी कानी ऊं करी ज्यी भेळी कार्रवाई मांय दिल्ली रा अलीपुर मांय 22 अप्रैल ने व्ह्या नरेन्द्र मलिक हत्याकाण्ड रा आरोपित सागर उर्फ शंकर ने मुठभेड़ पाछे पकड़ लियो ज्यो है। एंटी गैंगस्टर टास्क फोर्स अर अपराध रोकण रो काम देख रह्या पुलिस रा अतिरिक्त महानिदेशक दिनेश एम.एन. आ जाणकारी दीनी। एजीटीएफ राजस्थान दिल्ली क्राइम ब्रांच अर एनडीआर अर हनुमानगढ़ डीएसटी री टीम कानी ऊं टिब्बी थाना रा साबूआना मांय बदमाश सागर ने पकड़बा सारू घेराबंदी करी ज्यी। ई दौरान आरोपित री ओर ऊं पुलिस माथे गोळियां चलायी ज्यी। जवाबी कार्यवाही मांय पुलिस कानी ऊं चलायी ज्यी गोळी पग मांय लाग जावण ऊं मुल्जिम सागर जख्मी व्हे ग्यो जिण ने पकड़ लियो ज्यो। पकड़ी ज्या आरोपित ने ईलाज सारू हनुमानगढ़ रा सरकारी अस्पताल मांय भर्ती करायी ज्यो है।

000

कोटा रेलवे स्टेशन ऊं बच्चो चोरी करण रा मामला मांय पुलिस एक महिला समेत पांच आरोपितां ने गिरफ्तार कीना है। आं आरोपितां रे हरियाणा री गैंग सागे जुड़्या व्हेवण री शंका है। अ लोग बच्चों ने मदारी रो खेल बता र वारदात करता हा। ए.डी.जी. अनिल पालीवाल बतायो के बच्चा चोरी करण रो मकसद बच्चों ऊं मदारी रा खेल रे जरिये मजूरी करावणो हो। वे बतायो के कार्रवाई रे दौरान 10 साल पैली अपहरण करी ज्या एक बाळक ने दस्तयाब करी ज्यो।

000

झुन्झुनू जिला मांय सूरजगढ़ कने स्यालूकलां गांव मांय आज फौज री गोला बारूद डिपो रा जवान नंदू सिंह रो पूरा मान साग दाग करी ज्यो। नंदू सिंह रा दाग मांय मोटी तादाद मांय नौजवान तिरंगा ले र शामिल व्ह्या। ई मौके सूरजगढ़ रा विधायक श्रवण कुमार अर जनता रा दूजा नुमाइन्दा अर अहलकार पार्थिव देह माथे फूल चढा र नंदू सिंह ने याद कीना। ध्यानजोग है के नन्दू सिंह 8 मई ने लेह-लददाख डिपो मांय व्ह्या बम धमाका मांय जख्मी व्हे ग्या हा, ज्यो पी.जी.आई चण्डीगढ़ मांय ईलाज रे दौरान काल देवलोक व्हे ग्या।

000

प्रदेश मांय मच्छरां रे कारण व्हेवण वाळी बीमारियां माथे निजर राखण सारू चिकित्सा विभाग ओडीके एप जारी कीनो है। विभाग री अतिरिक्त मुख्य सचिव शुभ्रा सिंह आ जाणकारी दीनी। वे बतायो के मलेरिया, डेंगी, अर चिकनगुनिया जुलाई-अगस्त ऊं अक्टूबर-नवम्बर महीना ताई फैलबा री शंका रहवे है अर केन्द्र सरकार ई साल डेंगू री बीमारी फैलबा की शंका जतायी है।

शुभ्रा सिंह बतायो के ओडीके एप रे जरिये मच्छरां रे पैदा व्हेवण अर वां रा लारवा मिलण री ठौड़ां री फोटो खींच र स्वायत्त शासन विभाग अर पंचायती राज विभाग ने भेजी जावेला। ई पाछे संबंधित मेहकमा वां ठौड़ां एंटी लारवा अर मच्छर रोधी अभियान चलावेला।

000

चिकित्सा विभाग री अतिरिक्त मुख्य सचिव शुभ्रा सिंह बगैर जाणकारी लम्बा बगत ऊं दफ्तर ऊं गैर हाजिर चाल रह्या कर्मचारियां रे खिलाफ नियमानुसार अनुशासनात्मक कार्रवाई करण रा हुकम दीना है। ऐडा कर्मचारियां ने 3 दिन मांय काम माथे आवण रा नोटिस दिया जा रह्या है।

000

राज्य मांय पश्चिमी विक्षोभ रा असर ऊं केई ठौड़ां आंधी चालण अर बिरखा व्हेवण रा समाचार है। मौसम विभाग रे मुजब लारला 24 घंटां मांय सब ऊं बत्ता 30 मिलीमीटर बिरखा बांसवाड़ा रा सज्जनगढ़ मांय दर्ज करी ज्यी। चित्तौड़गढ़, सवाईमाधोपुर, दौसा, भीलवाड़ा, जयपुर, जोधपुर, कोटा, बीकानेर, बाड़मेर अर जालौर जिलां मांय कठे-कठे बिरखा व्ही। बाड़मेर अर सवाईमाधोपुर मांय आज ई दोपहरां पाछे आंधी चाली। बाड़मेर जिला रा चौहटन हलका रा केई गांवां मांय सिंज्यां री पोर ओला पड़्या। मौसम विभाग आज ई कठे-कठे हल्की बिरखा रा आसार जताया है। आं ठौड़ां रे अलावा राज्य मांय दूजी ठौड़ां तेज तावड़ो पड़ रह्यो है। म्हाणा जालौर खबरनवीस बतायो के वठे राज्य मांय सब ऊं बत्तो तापमान रह्यो अर पारो 45 डिग्री सेल्सियस ने पार कर ग्यो।

.....

राज्य रा घणखर हलकां मांय अधिकतम तापमान 40 ऊं 43 डिग्री सेल्सियस बीचे चाल रह्यो है। मौसम केन्द्र जयपुर रा निदेशक राधेश्याम शर्मा बतायो के 16 मई ऊं प्रदेश मांय गर्मी मांय और बधोतरी रा आसार है।

.....

झालावाड मांय आज ई जोरदार तावड़ो पड़्यो। दूजी कानी पाली जिला रा जोजावर मांय पक्षी बचाओ परिंडे लगाओ अभियान रा तैत साढे पांच सौ परिंडा बांधी ज्या। केकड़ी जिला मांय शेरगढ़ रा सरकारी स्कूल मांय पंछियां सारू परिंडा बांधी ज्या। बीकानेर मांय जिला परिषद री ओर ऊं काल सरकारी दफ्तरां मांय पंछियां सारू परिंडा बांधण रो अभियान सरू कर्यो जावेला। ई बीचे जोरदार तावड़ा अर ढांढा-ढोरां ने लू लाग जावण री शंका ने ध्यान राखता थकां पशुपालन विभाग झालावाड जिला रा झालरापाटन मांय 21 ऊं 28 मई ताई भरण वाळा श्री गोमती सागर वैशाख मेळो निरस्त करण रो फ़ैसलो कीनो है।

000

सवाईमाधोपुर जिला मांय चौमासा मांय पौधा रोपण रो खास अभियान चलायो जावेला। ई सारू वन विभाग न्यारा-न्यारा हलकां मांय पौध तैयार कर रह्यो है। पेश है म्हाणा खबरनवीस री रपट-

.....

000

जगद्गुरु रामानंदाचार्य राजस्थान संस्कृत विश्वविद्यालय री ओर ऊं लिया जावण वाळा बी.ए. अर एम.ए. रा पैला सेमेस्टर रा रेगुलर विद्यार्थी 20 मई ताई ऑनलाइन तरीका ऊं अर्जी दे सके है। विश्वविद्यालय रा परीक्षा नियंत्रक डॉ. शंभु कुमार झा बतायो के 100 रुप्या लेट फीस सागे 24 मई ताई अर दूणी लेट फीस सागे 27 मई ताई अर्जी दी जा सके है।

000

सांचौर मांय राजस्थान राज्य भारत स्काउट गाइड री ओर ऊं 17 मई ऊं 22 जून तांई कौशल विकास अर अभिरुचि प्रशिक्षण शिविर लगाया जावेला। तखत सिंह जमनालाल गहलोत राजकीय उच्च माध्यमिक विद्यालय रेबारियों का गोलिया मांय लागण वाळा ई शिविर मांय कम्प्यूटर चलावण, सिलाई करण, ब्यूटी पार्लर चलावण अर मेहंदी लगावण री सिखावण दी जावेला।

000